

В ПОНЕДЕЛЬНИК 4-Й СЕДМИЦЫ ПО ПАСХЕ

В туюжде Неделю вечера,

На Господи воззвах: стихиры праздника 3: и Миней 3.

Стихиры праздника, глас 8-й:

Подобен: О преславнаго чудесе!

О преславнаго чудесе! Творец всех плотоносец быв, в наше обнища естество, хотя яко благоутробен, и с человеки пожив, чудес множество евреом показа. Темже исцели иногда расслабленного, рек ему: возми одр твой, в Вифесду пришед.

Спасе Боже мой и Господи, падшия человеки воскресити хотя, на земли яко Человек обхождал еси исцеляя всех недуги, многога ради благоутробия. Темже пришед ко Овчей купели, цела воздвигл еси, иногда расслабленного, словом Твоим, тридесять осмь лет лежаща.

Завистию евреи снедаеми, благодеянием Твоим преблагий Господи, вину творяще, и неистовства разжжением, беззаконнующе сами в законе присно, Тебе искаху убить воистинну Жизнь, субботы ради, егда всего человека показал еси Ты здрава, прежде расслабленна суща.

Слава, и ныне: глас 5-й:

При Овчей купели человек лежаше в немощи, и виде Тя Господи, вопияше: человека не имам, да егда возмутится вода, ввержет мя в ню: егда же прихожду, ин предваряет мя, и приемлет исцеление, аз же немоществуяй лежу. И абие умилиосердився Спас, глаголет к нему: тебе ради Человек бых, тебе ради в плоть облекохся, и глаголеши: человека не имам. Возми одр твой и ходи. Вся Тебе возможна, вся послушают, вся повинуются: всех нас помяни, и помилуй Святей, яко Человеколюбец.

И абие, Свете тихий: Прокимен дне.

На стиховне стихиры, глас 3-й:

Твоим Крестом Христе Спасе, смерти держава разрушися, и диаволя прелесть упразднися: род же человеческий верою спасаемый: песнь Тебе всегда приносит.

Стих: К Тебе возведох очи мои:

Вечернюю песнь приносим Ти Христе, с кадилом и песньми духовными: помилуй Спасе души наша.

Стих: Помилуй нас Господи, помилуй нас:

Мученичен: Велия Креста Твоего Господи сила: водрузи бо ся на месте, и действует в мире, и показа от рыбарей апостолы, и от язык мученики, да молятся о душах наших.

Слава, и ныне, глас 1-й:

Дланию пречистою создавый человека, пришел еси Благоутробне недугующия исцелити Христе, разслабленнаго во Овчей купели, словом Твоим возставил еси: кровоточивой же болезнь исцелил еси: хананеи отроковицу стужаемую помиловал еси, и прощения сотника не презрел еси. Сего ради зовем: всесильне Господи, слава Тебе.

Таже, Ныне отпускаеши: По Отче наш:.

Отпустительный тропарь, глас 3-й:

Да веселятся небесная, да радуются земная, яко сотвори державу мышцею Своею Господь: попра смертию смерть, Первенец мертвых бысть, из чрева адова избави нас, и подаде мiрови велию милость.

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне, Богородичен, глас 3-й]

И отпуст.

В ПОНЕДЕЛЬНИК 4-Й СЕДМИЦЫ ПО ПАСХЕ

НА УТРЕНИ,

На **Бог** Господь: тропарь воскресен, глас 3-й:

Да веселятся небесная, да радуются земная, яко сотвори державу мышцею Своею Господь: попра смертию смерть, Первенец мертвых бысть, из чрева адова избави нас, и подаде мiрови велию милость. [Дважды]

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне; Богородичен, глас 3-й]

По 1-м стихословии, седален, глас 3-й

Христос от мертвых воста, начаток усопших, перворожден твари, и Содетель всех бывших, истлевшее естество рода нашего в Себе Самом обнови. Не ктому смерти, обладаеши: ибо всех Владыка державу твою разруши.

Стих: Господи, да не яростию Твоею обличиши мене, ниже гневом Твоим накажеша мене.

Живущи на земли душе моя, покайся, персть во гробе не поет, согрешений не избавляет, возопий Христу Богу: Сердцеведче, согреших, прежде даже не осудиши мя, помилуй мя.

Стих: Дивен Бог во святых Своих, Бог Израилев:

Мученичен: **Б**лагодушие терпения вашего, победи козни злоначального врага, страстотерпцы блаженнии. Сего ради вечного сподобистесь блаженства: но молитесь Господеву, христоробивых людей спасти стадо, мученицы суще истины.

Слава, и ныне:

Красоте девства Твоего, и пресветлой чистоте Твоей, Гавриил удивився, вопияше Ти Богородице: кую Ти похвалу принесу достойную? что же возыменую Тя? Недоумеваю, и ужасаюсь. Темже, якоже повелен бых, вопию Ти: радуйся Благодатная.

По 2-м стихословии седален, глас 3-й

Подобен: Красоте девства:

Разслабление обретоша всетелесное разслабленнии, завистию стягнени в субботу разслабленного стягнутие помышляюще, глаголюще: не достоин целити в субботу, разоряти же отеческое субботы покоище, закона Тебе не ведуще Владыку, и целителя душ наших.

Слава, и ныне: тойже:

Таже, Воскресение Христово: псалом 50. Таже каноны праздника со ирмосы, на 8: и Миней, на 4. Кондак и експостиларий праздника.

Песнь 1.

Ирмос: Дивно, славно, творяй чудеса, Ты еси Бог, бездну оземленивый, и колесницы потопивый, и люди спасый поющыя Тебе, яко Царю нашему и Богу.

Действуяй знамения, творяй чудеса Едине Царю, распятие волею претерпел еси, яко Щедр, и смерть смертию умертвив, оживотворил еси нас.

Во Христове востании людие днесь ликуим верно, пленен бысть ад, юзники яже содержаше, отдаде со тщанием, поющыя величия Божия.

Силою Божественною, иногда ослабленнаго словом Твоим Христе стягнувый, и повелевый ему одр взяти, многим временем немощствующую люте душу мою исцели.

В купель иногда овчую ангел сходяше, и единаго исцелеваше на всякое лето: крещением же Божественным ныне очищает безчисленная множества Христос.

Архангелу Михаилу: Начальниче ангелов, архистратиге вышних служителей, собравшыся в честном храме твоём, и Бога воспевающыя, покрывай и сохраняй от всяких искушений.

Троицен: В трех Лицах, едином же Естестве Безначальнаго Бога поим непрестанно со безплотными, Отца, Слова и Духа, Царство и Державу имуща нераздельную.

Богородичен: Чтущий сей Чистая град Твой всегда верно, спасай от бед, пленения варварскаго, междуусобныя брани, и меча, и всякаго иного прещения.

И святаго Минея на 4.

Песнь 3.

Ирмос: Неplодна душе и безчадная, стяжи плод благославный, веселящися возопий: утвердихся Тобою Боже, несть свят, несть праведен, паче Тебе Господи.

Зря Тебе иногда солнце на древе висяща Слове, свет скры, и трясашеся земля вся, мертвии восташа, мертву бывшу Тебе Всесильне.

С душею пришедшу Тебе во утробу земли, души яже стяжа ад, издаваше со тщанием, вопиющыя державе Твоей песнь благодарную, Едине Господи.

В летех многих немощствующую люте душу мою Преплагий исцели, якоже ослабленнаго прежде, яко да последую Твоим стезям, яже показал еси любящим Тя.

Архангелу Михаилу: С вышними чинми Божий архангеле, мольбу сотвори о верою поющих тя, соблюдая и храня нас, житейскими страстьми нападаемых.

Троицен: Слава Отцу возопиим, Сыну, и Духу, Един бо есть естеством Бог, Егоже силы вся Небесныя со страхом славят, Свят, Свят, Свят еси зовуще.

Богородичен: Безсеменное имела еси зачатие, и паче ума Рождество, Дево Мати Чистая: дело страшное, чудо превелие, ангелы почитаемое и человеки славимое, Отроковице Владычице.

И святого Минея на 4.

Кондак и седален святого.

И седален, глас 3-й:

Глагол разслабленного токмо стягну, яко Всемирное Слово Едино, нас ради на земли Явльшагося за благоутробие. Темже и одр нося мимоходяще, аще и книжницы зрети содеянное не терпяху, злобы содержими завистию, души разслабляюще.

Слава, и ныне, Богородичен:

Красоте девства Твоего, и пресветлой чистоте Твоей, Гавриил удивився, вопияше Ти Богородице: кую Ти похвалу принесу достойную? Что же возименую Тя? Недоумеваю и ужасаюся. Темже, якоже повелен бых, вопию Ти: радуйся, Благодатная.

Песнь 4.

Ирмос: Приосененную гору, Аввакум прозяше Пречистую Твою утробу Чистая. Тем вzywаше: от юга придет Бог, и Святыи от горы приосененныя чаши.

Еврейский собор завистию растаяваемъ, на древе распят Тя, Господи: и разорив осуждение смерти, яко Силен востал еси, мир с Собою совоздвигнув.

С муры жены, что неистощимое муро ищете? Востал еси, муроносицам рече, седая в белых ризах, поднебесную исполнив мысленнаго благоухания.

Рабий нося образ, за многое благоутробие ходаяй пришел еси, и здрава показал еси, во многих летех лежащаго, Слове, повелев и одр взяти.

Ангел убо Господень, на всякое лето сходя, воду в купели возмущае, совершая здрава единого точно: Христос же множество безчисленное Божественным крещением спасает.

Архангелу Миханлу: Начальниче ангелов и наставниче заблуждающих, Господень начальный Воеводо, в час сей посреде нас прииди, и молитвы всех принеси Единому Творцу и Владыце.

Троицен: Соединяемая Естеством, и разделяемая лица, есть Святая Троица, Отец Пресущный, Соприсносущный же Сын, и Святыи и Единый Всесильный Дух.

Богородичен: Чистая, како доиши? Како же родила еси Младенца, Адама Древнейшаго? Како на руку носиши Сына, Сущаго на раму херувимску, яко знает, якоже вестъ, вся Осушествовавый.

И святого Минея на 4.

Песнь 5.

Ирмос: Светом Твоим невечерним Христе, озари Боже смиренную мою душу, и настави на страх Твой, зане свет повеления Твоя.

Вознесыйся на древе крестнем, и совознесый мир весь, и быв в мертвых Боже, от века мертвые воздвизаеши.

Воскресе якоже рече Христос, истощивый вся адова царствия, и является апостолом, радость подавая вечнующую.

Белообразен виден бысть женам блистайся ангел: не кому плачите, Жизнь ваша воста, сущия во гробех мертвые Оживившая.

Разслабленного яко воздвиг еси Христе, ослабленную мою душу преступленьми оздрави, и шествовати мне Твоя правая стези споспешествуй.

Архангелу Михаилу: Ангелов наставниче Михаиле, собирающихся в храме твоём люди днесь, и проповедающих Божия величия спасай.

Троицен: Равночестная Трчисленная Единице, разделяемая убо верно Ипостасьми, соединяемая же Естеством есть, Отец, Сын и Божественный Дух.

Богородичен: Безсеменное Рождество Твое Чистая, непостижимое поем Рождение, блажаще Тя яко Матерь Творца всех и Владыки.

И святого Минея на 4.

Песнь 6.

Ирмос: Глубина страстей воста на мя, и буря противных ветров, но предварив мя Ты спаси, Спасе, и избави от тли, яко спас еси от зверя пророка.

Вознесыйся волею на древо, положился еси яко мертв во гробе, и сущия во аде мертвые вся вкупе оживив Христе, воскресил еси Божественною силою.

Ад срет Тя Щедре доле огорчися, связанныя отдавая со тцанием, Твое страшное поющих Спасе Воскресение, во гласех немолчных.

Божествени ученицы, видевшие Жезнь всех из гроба воставша Христа, любовию многою, и нравом правым, и веселием душевным покланяхуся.

Древле на одре болезненном, в letech мнозех слежай, Твоим Христе повелением исцелев, славит воспевая благоутробие Твое, Жизнодателю.

Архангелу Михаилу: Ангелов наставниче Михаиле, предстояй престолу Владычню, прииди посреде нас, наставляя к стезям жизни, тебе предстателя тепла стяжавших.

Троицен: Троицу лица чту, единицу же существом проповедаю, Безначальне Отче, Сыне, Душе Правый: Боже всех, с Вышними страшными воинствы.

Богородичен: Вся Божественным мановением носяй, держимь есть Богородице Дево во объятиях Твоих, всех нас восхищая, от руки работы лукаваго, яко Щедр.

И святаго Минея на 4.

Кондак, глас 3-й:

Душу мою Господи, во гресех всяческих, и безместными деяньми расслаблену, воздвигни Божественным Твоим предстательством, якоже и расслабленнаго воздвигл еси древле, да зову Ти спасаемь: Щедрый, слава Христе державе Твоей.

Икос: Руки Твоя горстию содержи концы Иисусе Боже, Отцу Собезначальный, и Духу Святому совладычествуяй всеми, плотию явился еси, недуги исцеляя, и страсти отгнал еси: слепцы просветил еси, и расслабленнаго словом Божественным ты возставил еси, сему напрасно ходити повелев, и сего носивший одр на раму взяти. Темже вси с ним воспеваем и возопиим: Щедрый, слава Христе, державе Твоей.

Песнь 7.

Ирмос: Пламень оросивый пещный, и отроки неопалимы спасый, благословен еси во веки, Господи Боже отец наших.

Простерта Ты на древе яко зряше, свет скры солнце, не могущее мiрови светити, Тебе волею зашедшу Всецарю, на просвещение всех языков.

Воскресл еси истощивый гробы, и пленивый ад силою всецельною: темже поем честное Твое Христе и Божественное Востание.

Яко мертва что Живаго ищете? Воста, несть во гробе, муриносицам вопияше древле блистаяся зраком Божественный ангел.

Слезаща в летех мнозех расслабленнаго словом исцеливый, вопиял еси: возми одр твой и ходи, поя величия Божия.

Архангелу Михаилу: Михаиле начальный воеводо Господень, верно в Божественном твоём храме собирающихся, во хваление Божие наставляяй, покрывай от всяких зол ходатайством твоим.

Троицен: О Троице, верою поющия Тя, яко Бога всех и Владыку, от всяких бед спасай, и Твоих благ причастники сотвори.

Богородичен: Девствуеша рождши паче слова, прежде всех век Рождагоса от Безначальна Отца Нетленного: сего ради Чистая, Тебе ублажаем.

И святаго Минея на 4.

Песнь 8.

Ирмос: Ангельми немолчно в вышних славимаго Бога, небеса небес, земля и горы, и холми, и глубина, и весь род человеческий, песньми Того, яко Создателя и Избавителя благословите и превозносите во вся веки.

Завеса раздрася распеншуся Тебе Спасе наш, и отдаваше мертвыя, яже пожре смерть: и ад обнажися, Тебе зря в преисподних земли бывша.

Где твое жало есть, смерти? Где твоя аде, ныне победа? Воскреспу Царю, умертвился еси и погибл, не ктому царствуеши: Крепкий бо взят яже имел еси связанныя.

Тецыте скоро, возвестите апостолом Воскресение, муриносицам явлейся юноша вещаше: воскрес Владыка и с ним иже от века мертвии преславно.

Леты многими слежай разслабленный зываше: помилуй мя, Избавителю, недоумением содержи. Сей же повелевает ему взяти тщательно одр, и право ступати.

Архангелу: **Я**ко невестственных предводитель архистратиге сил, с нами проси нам прегрешений избавление, исправление же жития, и тамошних наслаждение благ вечных.

Троицен: **Н**есозданное, непресекомое Существо, Троиипостасное Божество, Отца Безначальна Бога, и Сына, и Духа Святого воспоим согласно, серафимскую зовуще страшную песнь.

Богородичен: **С**виток Тя зряше Исаия Приснодево, в немже перстом Отчим, Слово Безлетное написася, от всякаго безсловесия спасающее нас, словесы Тя священными воспевающих.

И святого Минея на 4.

И поем Честнейшую:

Песнь 9.

Ирмос: **Н**а Синайстей горе виде Тя в купине Моисей, неопально огонь Божества заченшую во чреве: Даниил же Тя виде, гору несекомую: жезл прозябший, Исаия зываше, от корене Давидова.

Иисусе на древе возвышаемь, совознесл еси нас, и положився волею во гробе, из гробов мертвыя воскресил еси вся, поющыя державу Твою непостижимую, и силу Твою непобедимую.

Краснейший от гроба возсиял еси, яко Жених от чертога, краснейший Слове, и разрушил еси ада мрачное, и юзники извел еси, согласно зовущыя: слава славе Твоей, слава Иисусе Боже, востанию Твоему.

Воздыхания же и слезы носяща, с муры во тцании всесвятый гроб достигоша жены, и Христову учими бяху верою славному Востанию, еже празднуем в радости душевной веселящися.

Последоваше здравие тела, повелению Твоему Христе, и видимь баше прежде разслабленный, текий со тцанием, и одр носяй, на немже возлежал е леты многими, песнословя многую Твою силу.

Архангелу Михаилу: Просвещение нам испроси, Великий Архистратиге, присно Свету Великому предстояй, и умири нашу жизнь, напастьми всегда змиевыми и обстояньми жития зыблемую присно, достохвальне.

Троицен: Свет и Светове, Жизнь же и Жизни, славаю Тя всеблагочестно, Отче, Слове и Душе Святой, Троицкая Единице, Неразделимая Державо, Божество Неслитное, Свят, Свят, Свят, вопия с вышними силами.

Богородичен: От светоносных пройде ложесн Твоих Великое Солнце Христос, и мир просвети Пречистая, осияньми светлыми, и тму отгьят преступления: темже поем Тя яко вину всех добрых, Богоневесто.

И святого Минея на 4.

Катавасия: Светися, светися

Екзапостилларий,

Подобен: Жены услышите:

Предста Человеколюбец и Всещедрый Господь овчей купели, еже исцелити недуги: обрете же человека слежаща многими леты, и к нему возопи: возми одр и иди на пути правыя.

Слава, и ныне, тойже.

На хвалитех поставим стихи, 4: и поем стихиры Осмогласника, глас 3-й

Приидите вси языцы, уразумеите страшныя тайны силу: Христос бо Спас наш, еже в начале Слово, распялся нас ради, и волею погребесе, и воскресе из мертвых, еже спасти всяческая: Тому поклонимся. [Дважды]

Множицею песнопение совершая, обретохся грех исполняя, языком убо пение вещая, душею же безместная помышляю: но обоя исправи Христе Боже покаянием, и помилуй мя.

Мученичен: Святых страстотерпец память, приидите людие вси почтим: яко позор бывше ангелом и человеком, победы венец от Христа прияша, и молятся о душах наших.

Слава, и ныне: глас 1-й

Непогребен мертвец сый, расслабленный видево Тя, возопи: помилуй мя Господи, яко одр мой гроб мне бысть. Что ми приобретение живота? Не требую Овчия купели, не имам бо никогже влагающая мя, возмущающимся водам: но к Тебе источнику прихожду исцелений, да и аз со всеми зову: всесильне Господи, слава Тебе.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 3-й

Подобен: Велия Креста:

Знамений и чудес видяще силу, завистию разслабленнии и сильнии злобою не вероваху, яко Ты еси Сын Божий и Строитель всех, и разслабленнаго здрава показавый словом.

Стих: Милости Твоя Господи, во век воспою.

Видевше суббот хранителие, разслабленнаго стягнута в субботу, и душою омрачахся: и не подобает в субботу целити, и сквернити субботу, негли яко законнии книжницы, вопияху.

Стих: Яко рекл еси: в век милость созиждется.

Суббот Самодетеля не ведуще Тя и Господа, субботы храняции, о разслабленнаго стягнутии роптаху, в субботу бывшем, яко не добро, глаголюще, взяти одр в день субботный.

Слава, и ныне: глас 5:

Взыде Иисус во Иерусалим на Овчую купель, глаголемую иудейски Вифесда, пять притворов имущую: в тех бо слежаше множество немощствующих. Ангел бо Божий по вся лета сходя, возмущаше ю, и здравие подаваше приступающим верою. И видев Господь многовременна человека, глаголет к нему: хочещи ли здрав быти? Немощствуяй отвецаваше: Господи, человека не имам, да егда возмутится вода, ввержет мя в купель: врачом издах все имяние мое, и милости улучшить не сподобихся. Но Врач душ и телес глаголет к нему: возми твой одр и ходи, проповедуя Мою силу, и велию милость в концех.

Таже, Благо есть исповедатися Господеву

Трисвятое. И по Отче наш:

Тропарь, глас 3-й:

Да веселятся небесная, да радуются земная, яко сотвори державу мышцею Своею Господь: попра смертию смерть, Первенец мертвых бысть, из чрева адова избави нас, и подаде мірови велию милость.

Слава, и ныне, Богородичен, глас 3-й

Таже ектения: Помилуй нас Боже:

Час 1. И отпуст.

В ПОНЕДЕЛЬНИК 4-Й СЕДМИЦЫ ПО ПАСХЕ На Литургии

Блаженна Троида, песнь 1-й праздника, на 6.

Действуяй знамения, творяй чудеса Еди́не Царю, распятие волею претерпел еси, яко Щедр, и смерть смертию умертвив, оживотворил еси нас.

Во Христове востании людие днесь ликуим верно, пленен бысть ад, юзники яже содержаше, отдаде со тцанием, поющыя величия Божия.

Силою Божественною, иногда разслабленнаго словом Твоим Христе стягнувый, и повелевый ему одр взяти, многим временем немощствующую люте душу мою исцели.

В купель иногда овчюю ангел сходяше, и единаго исцелеваше на всякое лето: крещением же Божественным ныне очищает безчисленная множества Христос.

Слава: **В** триех Лицех, едином же Естестве Безначальнаго Бога поим непрестанно со безплотными, Отца, Слова и Духа, Царство и Державу имуща нераздельную.

И ныне: **Ч**тущий сей Чистая град Твой всегда верно, спасай от бед, пленения варварскаго, междуусобныя брани, и меча, и всякаго иного прещения.

По входе тропарь: глас 3-й:

Да веселятся небесная, да радуются земная, яко сотвори державу мышцею Своею Господь: попра смертию смерть, Первенец мертвых бысть, из чрева адова избави нас, и подаде мірови велию милость.

И храма Богородицы, и храма святаго. Посем настоящего святаго, аще есть. Таже кондак храма святаго. Слава: святаго:

И ныне: праздника: Кондак, глас 3-й:

Душу мою Господи, во гресех всяческих, и безместными деяньми разслаблену, воздвигни Божественным Твоим предстательством, якоже и разслабленнаго воздвигл еси древле, да зову Ти спасаемь: Щедрый, слава Христе державе Твоей.

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: **Хвалите Господа яко благ псалом: Богови нашему да усладится хваление.**

Апостол Деяний, зачало 24. [Деян. 10, 1 – 16.]

Во дни оны, муж некий бе в Кесарии, именем Корнилий, сотник от спиры нарицающийся Италийския, Благоговеин и бояйся Бога со всем домом своим, творяй милостыни многи людем и моляйся Богу всегда: Виде в видении яве, яко

в час девятый дне, ангела Божия спешша к нему и рекша ему: Корнилие. Он же воззрев нань и пристрашен быв рече: что есть, Господи? Рече же ему: молитвы твоя и милостыни твоя въздоша на память пред Бога: ныне послы во Иоппию мужей и призови Симона, нарицаемого Петра: Сей странствует у некоего Симона усмаря, емуже есть дом при мори: той речет тебе глаголы, в нихже спасешия ты и весь дом твой. И якоже отыде ангел глаголяй Корнилию, пригласив два от рабов своих и воина благочестива от служащих ему И сказав им вся, посла их во Иоппию. Воутрие же, путьшествующим им и ко граду приближающимся, възиде Петр на горницу помолитися, о часе шестем. Бысть же приалчен и хотяше вкусити: готовящим же онем, нападе нань ужас, И виде небо отверсто и сходящ нань сосуд некий, яко плащаницу велию, по четырем краем привязан и низу спускаемъ на землю, В немже бяху вся четвероногая земли и зверие и гади и птицы небесныя. И бысть глас к нему: встав, Петре, заколи и яждь. Петр же рече: никакоже, Господи, яко николиже ядох всяко скверно или нечисто. И (се) глас паки к нему вторицею: яже Бог очистил есть, ты не скверни. Сие же бысть трици: и паки взяся сосуд на небо.

Аллилуиа глас 1-й: Помяни сонм Твой, егоже стяжал еси исперва.

Стих: Бог же Царь наш прежде века, содела спасение посреде земли.

Евангелие Иоанна, зачало 24. [Ин. 6, 56 – 69.]

Рече Господь пришедшим к Нему иудеом: ядый Мою Плоть и пийй Мою Кровь во Мне пребывает, и Аз в нем. Якоже посла Мя живой Отец, и Аз живу Отца ради: и ядый Мя, и той жив будет Мене ради. Сей есть хлеб спешдый с небесе: не якоже ядоша отцы ваши манну, и умроша: ядый хлеб сей жив будет во веки. Сия рече на сонмищи, уча в Капернауме. Мнози убо слышавше от ученик Его, реша: жестоко есть слово сие: (и) кто может Его послушати? Ведый же Иисус в себе, яко ропщут о сем ученицы Его, рече им: сие ли вы блазнит? Аще убо узрите Сына Человеческаго восходяща, идеже бе прежде? Дух есть, иже оживляет, плоть не пользует ничтоже: глаголы, яже Аз глаголах вам, дух суть и живот суть: Но суть от вас нецыи, иже не веруют. Ведяше бо искони Иисус, кии суть неверующии, и кто есть предайй Его. И глаголаше: сего ради рех вам, яко никтоже может прийти ко Мне, аще не будет ему дано от Отца Моего. От сего мнози от ученик Его идоша вспять, и ктому не хождаху с Ним. Рече же Иисус обеманадесяте: еда и вы хотите ити? Отвеща убо Ему Симон Петр: Господи, к кому идем? Глаголы живота вечнаго имаши, И мы веровахом, и познахом, яко Ты еси Христос, Сын Бога живаго.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскресе тридневен от гроба, и мертвыя воздвигнувый: людие веселитесь. Светися, светися, новый Иерусалиме:

слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Хвалите Господа с Небес, хвалите Его в Вышних.
Аллилуиа, [трижды]